



2026/1828

29.7.2026

RIALACHÁN (AE) 2026/1828 ÓN gCOIMISIÚN

an 28 Iúil 2026

**lena leasaítear Rialachán (AE) 2023/915 a mhéid a bhaineann le huasleibhéil deilte-
9-teitrihidreacannaibionól (Δ^9 -THC) i nduilleoga cnáibe le haghaidh insileadh luibhe in uisce agus in
insiltí duilleog cnáibe**

(Téacs atá ábhartha maidir le LEE)

TÁ AN COIMISIÚN EORPACH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (CEE) Uimh. 315/93 ón gComhairle an 8 Feabhra 1993 lena leagtar síos nósanna imeachta Comhphobail maidir le héilleáin i mbia ⁽¹⁾, agus go háirithe Airteagal 2(3) de,

De bharr an mhéid seo a leanas:

- (1) Le Rialachán (AE) 2023/915 ón gCoimisiún ⁽²⁾ leagtar síos uasleibhéil le haghaidh éilleáin áirithe in earraí bia.
- (2) In 2015, ghlac Painéal an Údaráis Eorpaigh um Shábháilteacht Bia ('an tÚdarás') maidir le hÉilleáin sa Bhiashlabhra (Painéal CONTAM) tuairim eolaíoch i ndáil leis na rioscaí do shláinte an duine a bhaineann le teitrihidreacannaibionól (THC) a bheith i mbainne agus i mbia eile de bhunadh ainmhíoch ⁽³⁾. Tá THC, nó níos cruinne, Δ^9 -THC, ar an gcomhábhar is ábhartha den phlanda cnáibe *Cannabis sativa*. Shuigh Painéal CONTAM an ghéardháileog thagartha (ARfD) arb é atá inti 1 μ g Δ^9 -THC/kg de mheáchan coirp (bw).
- (3) D'fhone tuilleadh sonraí a fháil maidir le láithreach Δ^9 -THC i mbianna a dhíorthaítear ó chnáb agus i mbianna ina bhfuil cnáb nó comhábhar a dhíorthaítear ó chnáb, glacadh Moladh (AE) 2016/2115 ón gCoimisiún ⁽⁴⁾.
- (4) An 7 Eanáir 2020, d'fhoilsigh an tÚdarás tuarascáil eolaíoch ina ndearnadh measúnú ar ghéarnochtadh an duine do Δ^9 -THC ⁽⁵⁾, agus na sonraí tarluithe a gineadh trí Mholadh (AE) 2016/2115 á gcur san áireamh ann. I meastacháin áirithe ghéarnochta, sáraíodh an ARfD 1 μ g/kg bw. Maidir leis na meastacháin nochta, cé go bhfuil coinne leis go ndéanfar rómheastachán ar mheastacháin ghéarnochta Δ^9 -THC san Aontas, meastar gur ábhar imní féideartha don tsláinte é an nochtaidh do Δ^9 -THC atá ann faoi láthair.
- (5) Socraíodh uasleibhéil i ndáil le suim Δ^9 -THC agus Δ^9 -THCA, arna sloinneadh mar choibhéisí Δ^9 -THC, mar shíolta cnáibe agus mar tháirgí a dhíorthaítear ó shíolta cnáibe le Rialachán (AE) 2023/915 chun ardleibhéal cosanta do shláinte an duine a áirithiú.
- (6) Mar a dhearbhaítear sa Chatalóg um an stádas de Bhianna Núíosacha, toisc nach rud núíosach é insileadh duilleog cnáibe in uisce (nuair nach mbíonn barrchuid bhláfar thorthúil an phlanda leo) má thomhlaítear iad mar sin nó mar chuid d'insileadh luibhe ⁽⁶⁾ agus níl údarú sa bhreis ag teastáil ina leith de bhun Rialachán (AE) 2015/2283 ó Pharlaimint na hEorpa agus ón gComhairle ⁽⁷⁾, is iomchuí uasleibhéal a shuí i ndáil le suim an Δ^9 -THC agus Δ^9 -THCA, arna sloinneadh mar choibhéisí Δ^9 -THC, i nduilleoga cnáibe mar insileadh luibhe in uisce agus insiltí duilleog cnáibe (insileadh luibhe atá réidh le hól) chun ardleibhéal cosanta do shláinte an duine a áirithiú.

⁽¹⁾ IO L 37, 13.2.1993, lch. 1, ELI: <http://data.europa.eu/eli/reg/1993/315/oj>.

⁽²⁾ Rialachán (AE) 2023/915 ón gCoimisiún an 25 Aibreán 2023 maidir le huasleibhéil le haghaidh éilleáin áirithe i mbia agus lena n-aisghairtear Rialachán (CE) Uimh. 1881/2006 (IO L 119, 5.5.2023, lch. 103, ELI: <http://data.europa.eu/eli/reg/2023/915/oj>).

⁽³⁾ European Food Safety Authority (EFSA) Journal [Iris an Údaráis Eorpaigh um Shábháilteacht Bia (EFSA)] 2015;13(6):4141.

⁽⁴⁾ Moladh (AE) 2016/2115 ón gCoimisiún an 1 Nollaig 2016 maidir le faireachán a dhéanamh ar láithreach Δ^9 -teitrihidreacannaibionól, a réamhtheachtaithe agus cannaibionóidigh eile i mbia (IO L 327, 2.12.2016, lch. 103, ELI: <http://data.europa.eu/eli/reco/2016/2115/oj>).

⁽⁵⁾ EFSA (an tÚdarás Eorpach um Shábháilteacht Bia), Arcella D, Cascio C agus Mackay K, 2020. Measúnú ar ghéarnochtadh an duine do theitrihidreacannaibionól (Δ^9 -THC). EFSA Journal [Iris EFSA] 2020;18(1):5953, 41 lgh <https://doi.org/10.2903/j.efsa.2020.5953>.

⁽⁶⁾ Catalóg um an stádas de Bhianna Núíosacha https://food.ec.europa.eu/food-safety/novel-food/novel-food-status-catalogue_en.

⁽⁷⁾ Rialachán (AE) 2015/2283 ó Pharlaimint na hEorpa agus ón gComhairle an 25 Samhain 2015 maidir le bianna núíosacha, lena leasaítear Rialachán (AE) Uimh. 1169/2011 ó Pharlaimint na hEorpa agus ón gComhairle agus lena n-aisghairtear Rialachán (CE) Uimh. 258/97 ó Pharlaimint na hEorpa agus ón gComhairle agus Rialachán (CE) Uimh. 1852/2001 ón gCoimisiún (IO L 327, 11.12.2015, lch. 1, ELI: <http://data.europa.eu/eli/reg/2015/2283/oj>).

- (7) Ní chuirtear tomhaltas i measc naíonán agus leanaí óga d'insiltí duilleog cnáibe san áireamh san uasleibhéal. Tá sé iomchuí mar sin go bhfuil foláireamh ar an lipéad nár chóir a cheadú do naíonáin agus leanaí óga an t-insileadh luibhe réamh-ullmhaithe a thomhailt. Sa bhreis air sin, cuirtear san áireamh trasdul teoranta Δ^9 -THC agus Δ^9 -THCA ó na duilleoga in uisce isteach san insileadh luibhe i bhfianaise go bhfuil Δ^9 -THC agus Δ^9 -THCA de chineál lipifileach. Toisc go dtagann méadú mór ar an trasdul trí chomhábhar sailleach, cosúil le bainne nó uachtar, a chur leis na duilleoga agus iad ar maos, ní mór foláireamh a thabhairt nach bhfuil an comhábhar sailleach le cur leo ach amháin tar éis iad a bheith ar maos.
- (8) Dá bhrí sin, ba cheart Rialachán (AE) 2023/915 a leasú dá réir sin.
- (9) Chun ligean d'oibreoirí eacnamaíocha iad féin a ullmhú le haghaidh na rialacha nua i ndáil le duilleoga cnáibe don insileadh luibhe in uisce agus insiltí duilleog cnáibe (insileadh luibhe atá réidh le hól), is iomchuí foráil a dhéanamh maidir le tréimhse réasúnach sula mbeidh na rialacha nua i bhfeidhm. Is iomchuí freisin foráil a dhéanamh maidir le hidirthréimhse le haghaidh earraí bia ina bhfuil deilte-9-teitrihidreacannaibionól (Δ^9 -THC) a cuireadh ar an margadh go dleathach roimh dháta chur i bhfeidhm an Rialacháin seo.
- (10) Tá na bearta dá bhforáiltear sa Rialachán seo i gcomhréir leis an tuairim ón mBuainchoiste um Plandaí, Ainmhithe, Bia agus Beatha,

TAR ÉIS AN RIALACHÁN SEO A GHLACADH:

Airteagal 1

Leasaítear Rialachán (AE) 2023/915 mar a leanas:

- (1) leasaítear Airteagal 10(1) mar a leanas:
- (a) cuirtear an méid seo a leanas in ionad an fhrása réamhráitigh:
- ‘Féadfar bianna a chuirtear ar an margadh go dleathach roimh na dátaí dá dtagraítear i bpointe (a) go (t) a choinneáil ar an margadh go dtí a ndáta íosmharthanachta nó a ndáta éaga’;
- (b) cuirtear pointe (t) a leanas leis:
- ‘(t) An 1 Eanáir 2027, a mhéid a bhaineann leis na huasleibhéil le haghaidh suim Δ^9 -THC agus Δ^9 -THCA, arna sloinneadh mar choibhéisí Δ^9 -THC a leagtar amach i míreanna 2.6.4 agus 2.6.5 in Iarscríbhinn I’
- (2) Leasaítear Iarscríbhinn I i gcomhréir leis an Iarscríbhinn a ghabhann leis an Rialachán seo.

Airteagal 2

Tiocfaidh an Rialachán seo i bhfeidhm an fichiú lá tar éis lá a fhoilsithe in *Iris Oifigiúil an Aontais Eorpaigh*.

Beidh feidhm aige ón 1 Eanáir 2027.

Beidh an Rialachán seo ina cheangal go huile agus go hiomlán agus beidh sé infheidhme go díreach i ngach Ballstát.

Arna dhéanamh sa Bhruiséil, an 28 Iúil 2026.

Thar ceann an Choimisiúin
An tUachtarán
Ursula VON DER LEYEN

IARSCRÍBHINN

I Roinn 2: Faoi na tocsainí plandaí in Iarscríbhinn I de Rialachán (AE) Uimh. 2023/915, cuirtear na pointí seo a leanas 2.6.4 agus 2.6.5 le fo-roinn 2.6 ‘coibhéisí Deilte-9-teitrihidreacannaibionól (Δ⁹-THC)’

‘2.6.4	Duilleoga cnáibe mar insileadh in uisce	40	Ar lipéadú na nduilleog cnáibe beidh na ráitis seo a leanas i bpríomhréimse radhairc an lipéid (sa chlómhéid shonrach ⁽¹⁾) — ‘Le húsáid mar insileadh luibhe in uisce agus sin amháin (insileadh luibhe a ullmhú). — Níor cheart do naíonáin ná leanaí óga é seo a thomhailt. — Ní chuirfear aon chomhábhar sailleach cosúil le bainne nó uachtar leis agus é ar maos.’ Gan dochar do rialacha náisiúnta a d’fhéadfadh a bheith níos sriantaí i mBallstáit áirithe maidir le duilleoga cnáibe a chur ar an margadh.
2.6.5	Insilte duilleog cnáibe atá réidh le hól	0.02	Lena n-áirítear insiltí luibhe nach bhfuil déanta go heisiach as duilleoga cnáibe agus atá réidh le hól. Gan dochar do rialacha náisiúnta a d’fhéadfadh a bheith níos sriantaí i mBallstáit áirithe maidir le duilleoga cnáibe atá réidh le hól a chur ar an margadh.’